



Inatsisissatut siunnersuut: Timersorneq timigissarnerlu pillugit Inatsisartut inatsisaat nr. xx, xx. xx 2016-imeersoq.

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Pingajussarnerneqarnerani oqaaseqaatissaq:

Naluneqanngitsut siorna upernaakkut ataatsimiinnitsinni inatsisartut aliangigassaattut siunnersuuteqarnikuuvunga upernaq manna 2016-mi Naalakkersuisut kulturimut aammalu immikkut timersornermut inatsisissamik saqqummiusseqqullugit peqquneqarnissaannik.

Tassa kiisami aana ulloq qilanaarisimasara nallerpoq, tassa; timersornermut timigissarnermullu inatsisissatut siunnersuut naalakkersuisuniit saqqummiunneqarsimalerpoq, inaarutaasumillu akuersissutigalugu taassissutigisussanngorparput.

Taamaattumik piffissaq manna iluatsillugu inatsisartunut, naalakkersuisunullu tamanut qujanarujussuaq tapersersuisimanissinnut, minnerunngitsumik ilinniartitaanermut ilisimatusarnermullu ataatsimiisitaliamut suleqatigiilluarsimanitsinnut paaseqatigiilluarsimanitsinnullu qujanarujussuaq.

Nuannaarutigilluinnarpara tulluusimaarutigilluinnarlugulu, partii suminngaaneernej apeqqutaatippallaarnagu inatsisissalli pilersinneqartussap inuiaqatigiinnut tamanut siunissami sunniutissai pitsaasut pingaarnerutillugit isiginiarnerullugit partiit assigiinngitsut taamatut suleqatigiilluta pilersitseqatigiissinnaagatta.

Torrek taali qujanarujussuaq.

Imerajuttuunerup ikiaroorajuttuunerullu kingunipiluinit, aserugaanullu ukiumut 300 mio.kr sinnerlugit atortakkavut akuersaarneqarsinnaanngitsumik amerlavallaarujussuarput. Aningaasarpasuit siunertanut allanut pitsaanagerusunullu atorsinnaagaluarparput, taamaattorli asuli "igalaakkut eqqaannartarpagut". Tamanna akuersaarneqarsinnaangilaq, allannngortariaqarpoq iliuuseqarfigisariaqalerparpullu.

Timersorneq peqqinnartusoq tamatta nalunngilarput. Puallarluttuinnarnitta nalaani, peqqinnanngitsumillu inooriaaseqaleraluttuinnarnitta nalaani, ullut tamaasa timitta aalatittuarnissaata qanoq pingaaruteqartiginera paasereersimalerparput, soorlutaaq aamma timersornerup pitsaaliuineri sakkugilluarneqarsinnaanera ilisimallualersimassagipput qularinngikkiga.

Taamaattumik isumaqarpunga piffissanngortoq pilersaaruserluarnikkut eqqarsaatigilluakkamillu iliuuseqarnikkut imerajuttuunerup ikiaroorajuttuunerullu akiorneqarnissaanut.

Isumaqarpungalu timersorneq timigissarnerlu tassaasut pitsaaliuineri iliuusissat sakkussallu pingaarnerpaat ilaat.

Piffissaq iluatsillugu Kommuneqarfik Sermersooq maligassiuilluarneranut qutsavigerusuppara, immikkut iliuuseqarnermikkut sanngiinnerusortatta meerartaat nalinginnaasumik

timersornermut peqataanissaminnut periarfissaqanngikkaluartut immikkut iliuseqarnermikkut timersornikkut peqataanerulernissaat aqqutissiussimammassuk.

Neriuppungalu kommuneqarfiit allat tamarmik aamma taamatut iliuseqarniarumaartut.

Naggataatigut:

Nuannaariinnarlugu inatsisiliortoqarnissaanik kissaateqarnikuunngilanga; Neriuteqarlunga timersornermut inatsiliortoqarnissaa siunnersuutigisivara; taamaattumik neriuppunga inatsisissap uuma 2017-mi atuutilersinneratigut, anersaakkut timikkullu nukittunerulernissarput pillugu anguniagaqarnitsinni, aqqutissavut periarfissagullu pitsaanerungaalerumaartut.

Asanninneq, neriunneq, peqqinneq, nuannaarneq, ataqpeqatigiinneq, qanilaarneq, imminullu tatiginerulerneq qanortoq siammarlik inerinneqarlillu nunami maani inuinullu tamanut.

Tamassinnut qujanarujussuaq.

Peter Olsen